

Passa 70 cudeschs e desch traducziuns

Chesa Editura Rumantscha La Chasa Editura Rumantscha (CER) exista daspö l'on 2010 ed ha publichà infin uossa passa 70 cudeschs, cudeschs auditivs ed ebooks. Il böt da la CER es adüna stat da promover la scena da litteratura rumantscha e da render quella plü visibla eir sur ils cunfins dal chantun Grischun. La CER s'ha etablida fich bain illa rait da las chasas edituras svizras e chüra, il contact cun blers festivals litterars. Passa desch traducziuns d'ouvras rumantschas da la CER han pudü gnir realisadas fin uossa. La chasa editura spordscha eir servezzans professiunals d'ediziun e distribuziun ed ella ha adüna miss grond pais sülla chüra dal cuntegn.

D'üna comunicaziun a las medias resulta, cha tuöt ils texts vegnan lecturats cun premura, la creaziun sco eir la cumparsa dals cudeschs sun mincha jada concepids accuratamaing. Sper belletristica edischa la CER eir cudeschs per uffants e giuvenils. In üna seria vegnan edidas paravlas rumantschas in nouv vesti. Eir cudeschs da chanzuns, monografias d'art e diversas ediziuns da giubileums sun gnüdas publichadas cun success. Bundant la mità da las ediziuns cumparan biling e dafatta triling.

La structura da la chasa editura es simpla e consista da la manadra da gestiun Anita Capaul e da la collavuratura Karin Kohler-Pattis, oriunda da l'Engia-

dina Bassa. A la cumischiun per las ediziuns per creschüts fan part eir las duos romanistas engiadinaisas Annetta Ganzoni e Bettina Vital. Pel giubileum da desch ons da la CER vain lantschada ün'acziun da vendita d'urant ils mais november e december per tuöt las scoulas rumantschas. Al principi da november cumpara eir la terza part dal cudesch cun chanzuns rumantschas per uffants «La Grischa» cun 55 chanzuns in tuot ils idioms. Il cudesch cuntegna eir duos disc cumpacts cun tuot las chanzuns arrandschadas e chantadas da Corin Curschellas culs Fränzlis da Tschlin. La vernissascha dal cudesch es als 7 november, a las 12.00, illa Postremise a Cuaira. (pl)



Anita Capaul maina la Chasa Editura Rumantscha chi exista finglè daspö desch ons.

fotografia: CER